



A lokisetse Morena Sechaba se phethehileng. (Luka 1:17)

Tel: 28 350 466/ 62600983 (WhatsApp)

MOELETSI OA BASOTHO

PARARE DOMINO PLEBEM PERFECTAM



2

**Ofisi eo ke ea
sechaba**

**Ba mo amoha sa
khekhethane**

5



O BA NYANTŠITSE PHOOKO



Access Our Books on Akello Library!

Explore a wide range of our books anytime, anywhere.
Visit Akello Library today and start reading!

#ReadAnywhere #AkelloLibrary #ExploreMore



<https://library.akello.co/downloads>

Follow the link

bookcentre@mazenodprinting.co.ls

Need guidance? Call/ / WhatsApp: 27 350562 / +266 57396597

MOELETSI

E ka ba mohlolo!

Bongata ba Basotho ha ba lumellane le tsela eo Moetapele oa Mokha oa Selekane sa Basotho (BCM), Dr. Tšepo Lipholo a tšeroeng ka eona ka ho tseka naha. Kaha taba eo a sa iqapela eona e le ntho ea khale haholo ebile ho na le lingo-
loa tse ngotsoeng mabapi le eona. Empa joale Moetapele oa Mpulule Political Summit (MPS) o bontša hore Lipholo o ile a khelosa khetho ea Basotho, ho phetha lithahasello tsa hae tsa lipolotiki. Joale le re o ne a tla etsa lintho tse nepahetseng joang a qalile litaba tsa hae ka bomenemene le boqhekanyetsi? Le haeba o tšoare taba empa joale re se re hloka tšepo ea hore o na hlile a rerile ho etsa joalo, kapa o mpa a oelane le taba ena tseleng kamor'a hore lintho tseo a neng a li batla li nyope.

Leha ho le joalo, Moetapele oa Mpulule o re o ne a sa lokela ho tšoaroa, empa a isoe kapel'a Komiti ea Khalemo e nang le matla a ho sebetsa litaba. Ebe e ne e tla loka ka motho ea bonahalang a tebile hakaale, a qhekanyelitseng sechaba sa Basotho, a se roka mahloana naketsana? Mohlomong o ne a tla e mamela a khutle mekhoeng, ebe o ithuta mekhoe e nepahetseng ea ho loanela naha e hapi-
loeng. O se a hanetsoe ka beili Lekhotleng le Phahameng, 'me sena se ka bontša hore litaba tsa hae ha se papali feela.

Mokhethoa oa Mekaling ke eo a re o buella Moetapele oa Bohanyetsi mabapi le litokelo tsa hae tse bonahalang li hatikeloa, joaloka ho amohuoa balebeli le ho se be le koloi eo a tsamaeang ka eona a bile a alingoa. Tsena o li tekile kapel'a Motsamaisi oa Lipuisano Paramenteng ea ileng a mo fetola ka ho 'montša hore Moetapele oa Bohanyetsi o na le molomo a ka ipuela. Ka hona a mo eletse ho latela methati e nepahetseng hore litaba tsa hae li loke. Ho feta moo, o 'montša hore o bua lintho tseo a sa li tsebeng, kaha Motsamaisi e le eena ea etsang bonnete ba hore Moetapele oa Bohanyetsi o ba le koloi e mo tsamaisang. Hape koloi ea hae e se ntse e le tseleng, e se e tla fihla kamor'a nako e sa feliseng pelo. Ho rua tsebo ho bohlokoa, empa le teng methati kapa mekhoe eo e batloang ka eona e lokela ebe e hlokolosi kaha e ka hlahisa litaba tse sa hlokalang; joaloka nyeliso ea boinahano.

Lekala la Tekano, Bacha le Ntšetsopele ea Sechaba le tšoare ka matla a maholo ho thusa sechaba ho tsoa bof-
umeng. Letona le bontšitse ntlha ea bohlokoa haholo ea hore batho bao ha ba fuoe liphalello empa ba thusoa ka mekhoe ea ho itsoarela ka matsoho. Basotho ke batho ba matla ba ka sebetsang, hobane le Afrika Boroa koana bahiri ba rata ho hira Basotho ho feta matsoalloa. Taba ea liphalello e ile ea senya likelello tsa bona hoo ba seng ba qetella ba korot-
lela 'muso ka tsona. Sechaba se ka tlohela tsela eo se e sebelisang letsatsi le letsatsi e-ea le metsi, ebe se lebeletse hore se hiroe ho e lokisa. Na motho a ka tlohela ntlo ea hae e oela ebe o re ha se boikarabello ba hae? Boitsoaro boo ebe sechaba see sa Morena Moshoeshe bo se qopilitse hokae? Lekala lena le tiise kathata tabeng eo ea boiketsetso hobane re t'l'o qetella re e-na le sechaba se tla fetoha makhoba a linaha tse ling ka lebaka la botsoa.

Mokha oa Liketso le Bophethahatsi (BAP) o hlahlitse nyeoe Lekhotleng le Phahameng mabapi le setho sa ona seo o reng o se o tšeletse Letšolong la Ntlatfatso ea Moruo (RFP), kaha ho utloahala se tla etsetsoa mokete oa kamo-
helo. Hape o bontša ha eo a se a sa ikamahanye le litaba tsa mokha tse kenyeletsang ho ntša botho. Setho se latotse litaba tsena boseshe, 'me sa bontša hore ha se ne se kena ho BAP se ne se ikane hore ha ho mokha o mong oo se tla o kena ntle le eona. Le ha ho le joalo, se lokisa taba eo hobane se ne se tletsoe ke thabo ka hore se na le tokelo ea ho kena mokha ofe kapa ofe. Se bontša ha se tlohetse BAP hobane se hloka thahasello ho eona. Hape se re ha e-s'o etse phatlalatso mabapi le ho itokolla, empa mokha o entse hantle o ee makhotleng kaha a tla amohela kahlolo eo hobane paramenteng ha se leholimong moo motho a tla lula ka bosafeleng.

MOLIMO A BOLOKE LESOTHO LE BASOTHO

Ofisi eo ke ea sechaba

Nthabeleng Seitlheko

Moetapele oa Bohanyetsi Ntlong ea Bakhethoa, Mathibeli Mokhothu o re ofisi ea habo ke ea sechaba, ka hona hoa nepahala hore e bang ho na le litaba tseo mang kapa mang a bonang li sa tsamaee hantle kahar'a eona, a bue ka tsona ka Ntlong ea Bakhethoa. Litaba tse-na li hlalelletse tulong ea paramente ea la 2 Loetse monongoaha.

Ke hona litabeng tsena, moo a ileng a hlalosa hore sehlomathiso sa Leshome sa Molao oa Motheo, se hlomathisang Molao oa Motheo oa 1998, se phuthetse lintho tse ngata tseo 'muso o lokelang ho li falimehela le ho li kenya tšebetsong. A re litaba tseo ke tsa khiri le tsamaiso ea bahlanka, khiri ea Litsi tsa tšireletso, e bang o ke ke oa li ela hloko o tla iphumana o e-na le linyeoe tse ngata, tse tla etsa hore chelete e sebelisoa haholo linyeoe tse joalo.

A bontša hape hore boikemelo ba paramente bo lokela ho phethahatsoa bo tsamaea le taba ea khakanyo ea lichelete, ka hoo ke tebello ea bona e kholo ho bona likhakanyo tse tlang tsa lichelete li kenyeletsa litaba tsena, hape ho bonahale ho e-ba le liofisi tse tla thusa tsamaisong ea paramente. O re taba eo e kholo e hloka thupelo ea bahlanka le matona ba tle ba tsebe hore na liofisi tsa bona li ameha joang.

O re ntlha ena ea tsamaiso e amana le moralo oa tsamaiso ea meralo ea paramente, kaha ho setse lilemo tse peli feela ba fihla likhethong e le hore litaba tsohle tse matsohong a bona li felelle.



Litaba tsena li hlalelletse kamor'a hore Mokhethoa oa Mekaling, Thabiso Lekitla a eme ka ntlha ea tsamaiso ka paramenteng, moo a neng a kopa tataiso ho Motsamaisi oa Lipuisano Mohlomphehi Tlohang Sekhamane

goa koloi, 'me litaba tsohle tse mo lokelang li sireletsoa ke Molao oa Motheo.

O re ho lokela ho hlake hore e fela ba lokela ho phe-
la ba phuthulohile, ba na le khotso kapa ba matleng ba phuthe tsohle, khotso e an-



ea hore ke boemong bona boo ntlo e qetang ho fetisa sehlomathiso sa Leshome sa Molao a Motheo, seo ka nepahalo ho ileng ha ba le mokete oa hore kamor'a nako e telele Lesotho le tla bonahala le tsoile molo-
mong oa SADC.

O re le ha ho ile ha lilitsoa hore Naha ea Lesotho e na le khotso empa o ntse a hopola hore ba se ba feta selemo ba nang le matla ba tsekititse Moetapele oa Bohanyetsi balebeli ba hae ba kamehla le ba lapeng le hore h'a na koloi eo a tsamaeang ka eona kaha a lula a alin-

ele bona feela na?

H'a araba litaba tsena, Mohlomphehi Tlohang Sekhamane o hlalositse hore Moetapele oa Bohanyetsi ke setho sa Ntlo ea Bakhethoa ka lebaka lena o'a ipotsa hore na ke'ng e ka etsang hore a buelloe h'a le bothateng. O re ha motho a e-na le bothata; a etsoa hampe ebile a sa tšoaroa hantle o na le tokelo ea hore a mpe a tletlebe ba bang ba tle ba mo thusa.

O tsoetsepele hore Mokhothu poloheho ea hae e ikarabella ho eena ka kotlolo, ha ho le ka mohla a ileng a hlalosa a huletsoe balebeli empa haeba ho joalo o khotaletsa hore eo a nka likhato tse nepahetseng kaha a li tseba. O re taba ea likoloi tse teng tsebong ea hae ke hore o ile a bua le Moetapele oa Bohanyetsi hore ho bonahetse ho na le bothata hore a fumane koloi e mo lokelang, 'me eona e se e tla fihla kaha e batliloe.

"Ha se 'nete hore eo h'a na likoloi oa li alingoa kaha a li hireloa ke 'na.' ho araba Sekhamane.



Contacts: +266 28350 466

62600983 WhatsApp

Email: newsroom@moeletsoabasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

Editorial

Lesetsa Rakubutu

(+266) 6203 1949 / 58190670

EMAIL: editor@moeletsoabasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

57 665 038/ 68 216 271

Tšeliso Thakholi

58 540 853/ 63 480 404

Production Desk: 'Mateele Liqa

Baahloli ba nakoana b'a eketsoa



Nthabeleng Seithleko

Ele ho akofisa ho sebetse linyeoe tse morao, ka la 1 Loetse monongoaha lekhotla le hlapantšitse baahloli ba nakoana ba bahlano.

Baahloli ba nakoana ke

Justice Sekake Malebanye, Justice Tšepang Putsoane, Justice 'Manapo Motebele, Justice Palesa Rantara le Justice Tšooana Lesaoana. Moahloli e Moholo, Chief Justice Sakoane Sakoane ha a ba nkisa kano o hlalositse hore sena se etsahala tlas'a Molao oa Motheo oa Lesotho, khaolo ea 120

temana ea (5), o bontšang hore ba tli'o thusa ho fokot-sa linyeoe.

A re molao ona o hlalosa hore haeba ho na le sekheo, Moahloli e Moholo a ka eletsa Motlotlehi ho khetha baahloli ba nakoana. "Ba boetse ba khethoa tlas'a Komisi ea Bosebeletsi ea Baahloli ka tšebeliso

le Moahloli e moholo." Ke Sakoane eo.

Ho sa le joalo, baahloli bana ba nakoana, ba babeli Acting Justice 'Manapo Motebele le Tšooana Lesaoana ba tla sebetse Lekhotleng le Phahameng la Leribe Tšifa-li-Mali, ha ba bang ba tla sala ho le Phahameng la Maseru.

Lekhotla le Phahameng le bile leqemeng ka nako e telele, 'me ke moo le ileng la fa baahloli ba nakoana ba bararo mosebetsi ka selemo sa 2021. Baahloli bana ebile Acting Judge Lerato Rantara, Tšabo Matooane eo eseng e le mofu le Justice Semapo Peete ea ileng a khutla a se a le phomolong.

Lekhotla le ne le boele la tlatse likheo tsa baahloli ba bararo ho hlaha kantle ho naha, bao ba neng ba tšepetsoe ho mamela linyeoe tsa boleng bo holimo.

Ho feta mona, la boela la fa Justice Charles Hungwe oa Naha ea Zimbabwe mosebetsi, ea ntseng a matsetse linyeoe tseo har'a tse ling e leng nyeoe eo ho qosoang Molaoli oa mehlang oa Sesole sa Lesotho Lieutenant General Tlali Kamoli ka polao ea Molaoli oa mehlang Lieutenant General Maaparankoe Mahao. Justice Onkemetse Tshosa le Justice Kabelo Lebotse ho hlaha Naheng ea Botswana ba ne ba nyahlatse linyeoe tsena ka lehare.

Leha ho le joalo, Moahloli Justice Polo Banyane o ile a fumana mosebetsi moo a neng a kena lieteng tsa baahloli bana. Ho feta mona, lekhotla le boetse la eketsa baahloli ba bang ba robong ka selemo sa 2021 ho tla thusetsa; bona ke: Moahloli Justice 'Malebona Khabo, Realeboha

Mathaba, 'Makampong Mokhorro, Hopolang Nathane eo e seng e le mofu, 'Mabatšoeneng Hlaele, Moneuoa Kopo, Tšeli-so Mokoko, 'Maliepollo Makhetha, le 'Mafelile Ralebese. Lekhotla lena le ntse le e-na le qholotso ea tlhoko ea baahloli kaha lipelesa tse meja tsa baahloli li le mothating oa ho beha meja fatše.

Baahloli Justice Tšeliso Monapathi, Justice Semapo Peete le Justice Teboho Moiloa ba se ba le phomolong. Athe ba ntseng ba le mosebetsing ke Justice Molefi Makara, Justice 'Masefora Mahase le Justice Keketso Moahloli. Pele lekhotla lena le ka fa baahloli bana mosebetsi le ile la tobana le qholotso ea hore ho hlokahale Moahloli Justice 'Maseshophe Hla-joane ka selemo sa 2019, Justice Lebohang Moletse ka 2020 le Justice Thamsanqa Nomnqongo ka 2021.

Chief Justice Sakoane Sakoane o bonahetse nakong e fetileng a le lesisitsho ho lokolla Justice Tšeliso Monapathi ho ea hae, ka le reng eo o sia linyeoe tse ngata tse e-s'o buoe.

Basotho ba ikholla bofumeng

Nthabeleng Seithleko

Ele ho ntlafatsa bophelo ba malapa a tlokotsing kahar'a naha, Lekala la Tekano, Bacha le Ntšetsopele ea Sechaba, le bile le mokete oa lipontšuo ho bapatsa lihlahisoa tsa bahoebi, tlas'a Morero oa Boipheliso Metseng, Seter-ekeng sa Quthing, ka la 30 Phato monongoaha.

H'a bua moketeng ona, Letona la Tekano, Bacha le Ntšetsopele ea sechaba, Mohlomphehi Pitso Lesaoana o bontšitse hore ke ka lilemo tse ngata lekala la habo le oa le tsoha le batho ba tlokotsing, ka mananeo a kenyeletsang litsiane tsa batho ba tlokotsing hore ba se salle morao lithokong tsa letsatsi le letsatsi.

O boetse a supa hore ho fihlela joale, litsiane tsena li thusa malapa ho reka lijo, ho arabela lithoko tsa bana tsa sekolo le lithoko tse ling tsa mantlha, empa ha li atlehe ho fihlella lithoko tsa nako e telele.

A re e le ho arabela qholotso ena, 'muso ka tšehetso ea Banka e Kholo ea Lefatše o ile oa hlahisa lenaneo lena la Morero ea Boipheliso Metseng, ka sepheo sa ho khahlametsa

malapa a tlokotsing hore a ithahisetse esita le ho iqalla likhoebo tse nyenyane tse tla ba thusa khahlanong le bofuma.

"Sechaba se utloisise hore lenaneo lena, ha se la ho fana ka lithuso kapa liphallelo, empa le reretsoe ho khahlametsa Basotho ba tlokotsing, ka ho ba fa mokhoa oa ho qala likhoebo tse nyenyane, lisebelisoa le tšehetso hore ba tsoe bofumeng." Ho rialo Lesaoana.

A re morero ona o sebetse literekeng tse hlano tsa naha eleng sa Mohale's Hoek, Mafeteng, Berea, Leribe le Quthing ka Lekhotla la Puso ea Libaka la Tosing.

H'a tsoelapele, o bontšitse hore ho fihlela ha joale, Makhloteng a mahlano a Puso ea Libaka, morero o se o tšehelitse malapa a 2,170 'me Tosing ke malapa a 443 a fumaneng molemo, ho tsoa metseng ea Ha Potomane, Pokane, Sebapala, Tsatsane, Ha Makoe, Tosing, Daliwe, Ha Mafura le Makatseng. A re morero ke hore ho une batho ba ka bang 1,000 molemo.

A hlalosa hore morero ona o boetse o tšehetsa lihoai tse 38 tsa meroho le tse ngata tsa liphoofole tse ahang likhoho tsa nama ka lipalo tse ka bang 2,359, likhoho tsa mahe ka 620 le lenane la 976 la likhoho tsa

boschvelt le black australop hammoho le likolobe tse 405.

H'a phethela o thoholelitse mafapha ohle a kentseng letsoho katlehisong ea morero ona, empa ka ho khetholoha Banka e Kholo ea Lefatše, 'me a tšepisa hore lekala la habo le tla sebetse ka ponaletso le boitelo ho bona hore morero ona o fihlela sepheo sa oona.

Mookameli oa Catholic Relief Services, Kanono Thabane o bontšitse hore morero ona o thusang sechaba ho ikhoholla bofumeng o bohlokoa kaha ho fumanehile hore lefatšeng ka bophara litaba tsa ho ikhoholla bofumeng ha li tsamaea le thupelo ho ba le likatleho tsa moshoelella



toantšong ea bofuma.

"Ho fa bahoebi bana ba ba nyenyane monyetla oa ho bapatsa lihlahisoa tsa bona ke mohato o matla ka ho fetisisa hobane ke ka sethala sena ba atlehang ho tsebahala ho lenane le lengata la bareki, ho fetisetsana litsebo esita le ho hokahana le litsebi litabeng tsa khoebo." Ho bolela Thabane.

A thoholetsa boikitlaetso ba bahoebi bana tšebet-song ea bona ka le reng ke ka mamello feela likhoebo tsa bona li ka holang le ho hlahisetsa Basotho ba bang mosebetsi ho fenyha bofuma.

A leboha bohle ba bileng le seabo ntšetsopeleng ea morero ona ho kenyeletsa Mokhatlo oa Caritas Lesotho, Dunamus Agri Advisory le Doorways esita le mare-na 'moho le bakhethoa ba puso ea libaka, ka le reng esale e le bona ba tsoereng ka thata ho hloaea sechaba se hlohang lithuso morerong ona.

E mong oa baahi ba un-neng molemo morerong ona, Relebohile Nkhooa o bontšitse hore taba-tabelo ea hae esale e le ho rua likhoho tsa mahe, 'me morero ona o mo thusitse ho ntšetsa toro ea hae pele, kaha kamor'a ho fumana chelete le lisebelisoa a atlehile ho ntlafatsa tlhahiso ea leruo la hae.

MOELETSI O TŠEHETSA BACHA

Tšelis o Thakholi

Ho bonahala mat-satsing ana ba-cha ba Naha ea Lesotho ba ikemiselitse ho ntlafat-sa bophelo ba bona le ho nyolla moruo oa naha ka litsela tse fapakaneng tsa ho ithlahisetsa mesebetsi, ka ho etsa mefuta e mengata ea lihlahisoa tseo ba iqapetseng tsona. Tse ling tsa lihlahisoa tsa bona li ncha haholo mebarakeng li qala ho bonoa kahare le kantle ho naha. Mofumahali 'Makhabisi Ntšenia ke e mong oa basali ba ntseng ba le bacha haholo lilemong ea nang le talenta e kheth-ehileng ea ho ithlahisetsa mesebetsi e fapakaneng eo a iphelisang ka eona.

Bacha ba heso, hona ke mohlala ho lona hore ka litalenta tseo Morena Mo-limo a le fileng tsona le ka tseba ho iphelisa le sa hiroa. Boipiletso ba rona ho 'muso oa habo rona ka mafapha a fapakaneng a fuoeng boi-karabello ba ho matlafatsa likhoebo tsa bana ba Baso-tho, ke ho tšehetsa batho ba mofuta ona ba bonahalang ba e-na le lineo tse ka ntšet-sang pele Naha ea Lesotho. Ntšenia o na le litsebo tse khetheliheng tsa khoebo tseo a hlohang ho fuoa tše-hetso e le hore a tsebe ho hlahisetsa bacha ba banga-ta mesebetsi e fapakaneng. Re lakalitse hore kajeno a ke a re khoahollele seo a re fuparetseng sona.

LEBITSO LA KAMPANI
Ke mothehi oa Kampani e bitsoang Atlehang Foods e fumaneha Ha Leqele Se-terekeng sa Maseru. Hau-finyane haholo re se re tliš'o fumaneha Botšabelo haufi le Sepetlele sa Tšepeng.

LIHLAHISOA
Kampani ea Atlehang Foods e hlahisa mefuta e fapa-kaneng 'li-biscuit' tse lut-lisang mathe ka monate tse entoeng ka mabele, poone le koro. Re boetse re hla-hisa lipompong tse monate ka ho fetisisa. Ka holimo ho tsohle re hlahisa senoa-ma-pholi se entoeng ka liapole, liperekisi, libanana, lipere le mefuta e meng e mengata ea litholoana.

TŠUSUMETSO
Ho tloha ha esale ke le monyenyanane ke utloa ke e-na le lerato la ho ba mo-hoebi. Ke rata hore le 'na nke ke iphumane ke e-na le khoebo ke itšebetsa. Tlhase ea lerato lena ea tutisoa ha-holo ha ke hlokomela hore bacha ba aperetsoe ke tl-hokahalo ea mesebetsi le



hore ho bonahala naha ea habo rona e pepile ho Afrika Boroa ka ntho e 'ngoe le e 'ngoe hoo ha Afrika Boroa e thimola rona rea khohlela. Ke moo boinotšing ba ka ke ileng ka nahana seo motho a ka se etsang ho fokotsa maemo ana a tlokotsi haholo ea tlhokahalo ea mesebetsi bacheng le ho fokotsa sekahla sa lintho tseo re li rekang naheng ea bo-haelani empa e le tseo re ka iketsetsang tsona. Ke ha ke tla theha kampani ena.

BOHLOKOA BA HO ITŠEBETSA

Ha motho a itšebetsa o ipe-hela meoloane eo a batlang ho e fihlela, 'me motho o sebetse ka thata maemong ohle hore a e fihlele kaha o'a ikhanna e le ho fihlela likatleho tsa khoebo ea hae. Motho o'a itšepenhalla khoe-bong ea hae e le hore a tse-be bo fihlela likatleho. Taba e 'ngoe ea bohlokoa eo motho a lokelang ho e tseba ke hore litabeng tsa khoebo o lokela ho hloka letsoalo kapa boi ba ho etsa ntho e itseng. Motho h'a itšebetsa a e-na le letsoalo le bolaea litoro tsa hae, ebe khoebo

ea hae ha e atlehe ho hola. Hape motho o lokela ho ba le boitšepo kaha bo etsa hore motho a be le sebetse sa ntho eo a etsang. Hape ho bohlokoa hore motho pele a etsa khoebo e itseng a qale ka ho etsa boithuto bo tebileng ka eona.

LIQHOLOTSO
Liqholotso e bile hore khoe-bo 'maraka oa eona o mo-holo 'me lihlahisoa ha li lekane baji kaha ke hloka mechini e meholo e tla etsa hore ke hlahise haholo. Ka lebaka lena e ntšebelisa tla-sa khatello e kholo ka le-

aka la tlhahiso e fokolang. Ka hona ke kopa thusa ho 'muso oa habo rona ho etsa letsoho la monna e le hore ke tle ke tsebe ho etsa ho tla anela baji.

BOKAMOSO
Ke rata ho bona khoebo ena ea ka e holile ho feta mona, kaha hajoale ke hirile bacha ba robong 'me ba bahlano ke basebetsi ba nako eohle ha ba bane ba e tla ka linako tseo mosebetsi o leng mon-gata. Re sebetse ka thata ho bona hore kamor'a nako e seng kae re be re tseba ho fepela Naha ea Lesotho ka kakaretso re se bile re romela lihlahisoa tsa rona kantle ho naha.

BACHA
Ke khothaletsa bacha ho etsa ntho eo ba e ratang, ba se ke ba etsa ntho ho-bane motho a e etsa, ba lule fatše ba inahane ka botebo hore na ba rata'ng. Haeba ba rata ho tšoana le 'na ba etse mosebetsi oo ka pelo eohle ea bona. Ka nako e 'ngoe ba tla ithuta ha ba se ba ntse ba le kahar'a mofuta o itseng oa khoebo hore e hlile ha se oo ba o abetso-eng. O tlohele mocha u etse o mong.

Kenyeletsa kahar'a khoe-bo ea hau mefuta e meng ea mesebetsi e nyallanang hantle le seo u ntseng u e etsa, u se ke u'a shebana feela le o le mong oo u ntse u o etsa. 'Na ha ke etsa li-kuku ha ke etse mofuta o le mong feela hobane ke na le tsebo e ngata haholo ea tsona. Hlahisa ntho e ncha e fapakaneng le eo batho ba bang ba ntseng ba e etsa e tlang ho khahla mahlo a batho. Bacha ha re emeng ka maoto re ithlahisetsa mesebetsi ka litsebo tseo re nang le tsona.



E mo amoha setulo sa khekhehane

Nthabeleng Seitlheko

Mokha oa Liketso le Bophethahatsi (BAP), o hlalletse nyeoe Lekhotleng le Phahameng la Lesotho, ka 1 Loetse monongoaha le kopa Lekhotla ho phatlalatsa sekheo setulong sa ona sa khekhehane, se neng se lutsoe ke Tello Kibane hobane o se a nkile botho ho Letšolo la Ntlafatso ea Moruo (RFP). Litaba tsena li boletsoe tse Mongoli-Kakaretso oa BAP Lepolesa Makutoane puisanong le Koranta ka la 3 Loetse monongoaha.

Makutoane o re baikarabelli nyeoeng ena, ke Tello Kibane, Motsamaisi oa Lipuisano ka Lekhotleng la Sechaba, Moeletsi e Moholo oa Molao oa 'Muso le Komisi e Ikemetseng ea Likhetho (IEC).

O re ba na le bonnete bo feletseng ba hore eo o na le botho ba RFP, ebile o lokela ho ea ketekeloa ka litlatse le ho amoheloa ke litho tsa RFP e leng se etsang hore eo ebe o tšetse le ha a sa tšela paramenteng mahlong a sechaba. O re hoa tseba-



hala hore BAP ha se karolo ea puso.

O re se makatsang ke boiphosiso bo etsoang ke Motsamaisi oa Lipuisano Paramente ka ho hohela litho tsa RFP ho khutlela ka bohanyetsing. O re ho fihlela hona joale hobane eo e leng setho sa khekhehane sa BAP h'a ikamahanye ka letho le mokha oa habo, o

sebetse le 'muso ebile h'a nchafatsa botho joaloka litho tse ling.

O re hona ke bopaki bo feletseng ba hore Kibane ha e sa le setho sa BAP ho latela tsamaiso. O re ba sobantse lifahleho ba hloka ho abeloa toka joaloka mekha e meng 'me litaba tsa bona li sebetsoe ho ipapisitsoe le molao.



Ho ea ka molao oa likhetho karolo ea 188 e bontša hore setho sa khekhehane se tla tloha mokheng oa habo sona ha se tšetse kapa se itokollotse kahar'a mokha o joalo.

O re ba hloka ho bona BAP e tsitsitse e sebetse 'moho eseng likarohano le litlhokofatso tsa batho ba seng ba lebetse hore na ba

isitsoe paramenteng tlas'a maemo afe.

Setho sa Ntlo ea Bakhetho oa ba Sechaba Tello Kibane o re ho latela mathata le lintoa tse kahar'a BAP o bone hore le hoja a ne a itse nakong eo ba thehang BAP ha ho sa na mokha oo a tla ea ho ona, o hlokometse hore seo o ne a se buisoa ke thabo ea ka nako eo.

A re o tla lula a le teng lipolotiking tsa Lesotho tlasa BAP kapa mokheng o mong kaha a re mokha ha se BAP feela le hore o se a se na thahasello ea ho sebatsa le bona.

O re taba ea hore o se a furalletse BAP ho leba RFP eena ha e-s'o etse qeto e joalo kaha motho ha etsa qeto oa iphatlalatsa joale eena ha e-s'o etse phatlalatso ena.

Ho feta mona Kibane o itse BAP e sebelitse hantle ha e ile Makhotleng a Molao ntlheng ea setulo sa BAP, 'me e bang lekhotla le ka re a se theohe o tla etsa joalo ntle le khang ea letho hobane paramenteng ha se leholimong moo motho a ka lilelang ho phela teng hobane bophelo bo teng le ho tsoelapele ka ntle ho paramente.

Ba khothaletsoa bonngoe lipolotiking

Nthabeleng Seitlheko

Ele ho matlafatsoa bacha lipolotiking, UNESCO e tsoaretse baetapele ba bacha lipolotiking 'moka oa tlhahlobo le kutloisiso ea tsamaiso ea lipolotiki kahar'a naha ka la 29 Phato Monongoaha.

Mohokahanyi oa tsa Mahlale UNESCO, Bontle Ntsoaole o hlalositse hore mosebetsi oa UNESCO ke ho tataisa bacha ka boetapele le boqapi, esita le ho aha khotso lipakeng tsa bacha.

"Sepheo ke ho theha moloko o nang le boikarabello, tsebo le pono e hlakileng ea bokamoso lipolotiking." A hlalosa a joalo. Ho feta mona, o re seabo sa bacha litabeng tse ba amang ho tla thusa ho rarolla liqholotso tse ba tobileng, tse kenyeletsang tlhokahalo ea mosebetsi le thuto ea bo leng bo tlaase har'a tse ling. A re boikemisetsa ba

bona e le mokhatlo ke ho bona bacha ba kenyeletsoa litabeng tsa naha le ho fuoa sebaka sa ho hlalosa maikutlo ka meralo ea naha. "Re hloka ho bona mocha e mong le e mong oa Lesotho a sa salle morao ka lebaka la boemo ba hae, re hloka ho kenyeletsoe le balisana, ka ha le bona ba ameha ke liqeto tse nkoang kahar'a naha." Ke Ntsoaole eo.

Ho feta mona o khothalelitse bacha ho sebelisa thuto ho ipopa ngatana-nngoe. A eletsa bacha haholo ba lipolotiking ho tlohele ho supana ka menoana, kaha sena se tla ba thusa ho ba mohopolo o mong le ho sebetse hammoho ho loantša mathata ao bacha ba tobaneng le oona kahar'a naha.

Mothehi oa Gem Institute, Mpho Letima ha a hlalella bacha o itse ba ipapise le litlhoko tsa mantlha tsa bacha Lesotho. "Bacha ba kenang lipolotiking ba lokela ho tseba hore mohoo ke sesebelisoa sa bohlokoa sa boetapele. Ke sethala seo ka sona u bontšang pono ea hau le moralo oa hore na u tla thusa sechaba joang, 'me ha u se na mohoo o

hlakileng, sechaba se sitoa ho tseba hore na u emetse'ng, kapa hore na u tla ba thusa joang." Ho bolela Letima.

A tsoelapele hore ha ho thehoa mehoo ho lokela hore ho qaloe pele ka ho buisana le sechaba, ho mamele littlelebo, litaba-tabelo le mathata a sona ka hloko, kaha sena se tla ba thusa ho aha mehoo e arabelang litlhoko tsa sechaba.

Ea bileng le seabo thupelong ena, Tlotliso Manko Makutoane o bontšitse hore ho ea ka lipalo-palo ho bonahala bacha e le bona ba bangata, 'me mokheng oa habo ba shebane le ho bona hore bacha ba kenyeletsoa meralong ea naha le ho ba le lentsoe kaha naha e tla sala matsohong a bona.

A re bacha ba lokela ho ikakhela ka setotsoana tsamaisong ea mekha ka kakaretso e le hore ba be le seabo le ho fana ka maikutlo le boeletsi litabeng tse ba amang ka kotloloho.

A phethela ka hore kahar'a makhotla palo ea bana e lokela ho lekana le ea basali kaha ba na le seabo se tsoanang.

Moeketsi Suthang o bontšitse ha bacha ba kahasahar'a lebatama la tlhokahalo ea mosebetsi, 'me mohoo oa pele mokheng oa habo e le ho loantša sena.

A re bacha ba lokela ho kenyeletsoa meralong ea lintlafatso tsa naha, ka

hona ba eme ka thata ho bona hore bacha ba fumana monyetla oa ho ntšetsa lithuto tsa bona pele ntle le litefiso tsa letho, hobane ka litsebo tseo ba li fumaneng likolong ba tla kenya letsoho le toma ho ntlafatsa Lesotho.

57396597
28 350 815

28 350 466
lesaoanat@gmail.com

Malebela

Scan me

U se u ka fumana buka ea Malebela ho marang-rang a boletsoeng ka tlase kapa oa sebelisa code e kaholimo.

Get the Akello app on Play Store, App Store, or Huawei App Gallery for Mazenod books and more. Download now!

<https://library.akello.co/downloads>

akello

Ba arajoa ka ho panya ha ntši



Nthabeleng Seithleko

Lekala la Lihloliloeng le nehelane ka matloana le tanka ea pokello ea metsi Sekolong sa Mathomo sa Maputsoe ACL ka la 29 Phato monongoaha. Letona la Thuto le Koetliso, Prof. Ntoi Rapapa o bontšitse hore mokhethoa oa Maputsoe o kentse letsoho ho netefatsa hore likolo tsa tikoloho eo li'a ntlafatsoa, 'me lekala la habo le motlotlo hore ebe o ntse a ba thusa hore ba fihlele ntlafatso ea likolo.

A re ho molemong oa morutoana e mong le e mong ho kena sekolo moo tikoloho e bolokehileng, kaha seo se kenya letsoho bophelong bo botle ba bona hammoho le litichere.

O re matloana a hloekileng a maemong a matle, ke tlhoko ea mantlha boithutong ba bana haholo ba banana, ka hona ba lokela ho thusetsa moo tlhoko e leng teng, 'me ho fihlela hajoale lekala le ntse le sebetsa ka thata ho thusetsa likolong tse tlokoising. O hlalositse hore ho tlele tlhokomelong ea lekala hore Sekolo sa Maputsoe se seholo haholo kaha se na le barutoana ba fetang 1000, empa e le Sekolo sa Mathomo.

A tšepisa hore lekala la habo le ntse le etsa meralo ea hore se ekeletsoe meaho le litichere e le hore se holiso e hore se be le sekolo se mahareng. A bontša hore phepelo ea metsi a hloekileng e fetola bophelo ba sechaba, e seng feela likolong empa le ba phelang metseng, ka hoo ha lenane la bana le balloa ho 1000 hoa lokeleha hore bana ba joalo ba fumane metsi a hloekileng ka linako tsohle.

O khothalelitse bana ba tikoloho ena ho se ameha litlolong tsa molao, kaha tikoloho ea bona e aparetsoe ke litloaello tse mpe tse ka emang bokamoso ba bona pele.

Letona la Lihloliloeng, Mohlomphehi Mohlomi

o supile hore ba sebeletsa hore selemo sa 2030 e fihle Mosotho e mong le e mong a e-na le metsi, 'me likolo le tsona li'a kenella moo kaha e le sebaka seo bana ba qatang nako e telele teng. A bontša hore morero oa phepelo ea metsi mabalane o reretsoe ho anetsa metsi ho Basotho ba 1.1 milione, 'me tebello ke hore o kenye letsoho ho thusetsa litlhokong tsa mantlha tsa sechaba nakong ea tšebetso kahare ho litereke.

A leboha botšehetsi boo ba bo fuoang ke Banka ea Lefatše hammoho le boitelo boo mokonteraka a faneng ka bona ho atlehisa morero ona, hobane o kentse letsoho le ho tla nehelana ka limpho tse itseng ho barutoana, 'me seo se pakahatsa tšebeliso e mofuthu.

Moemeli oa Banka ea Lefatše Lesotho, Dr. Dinara Djoldosheva o hlalositse hore Banka ea Lefatše e ikemiselitse ho thusa

la Maputsoe, Stephen Mputi o lebohile Lekala la Lihloliloeng ka ho arabela sello sa sekolo seo ka nako e sa feliseng pelo kamor'a ho etsa kopo ea ho nanabeletsoa ka lithuso tsa khaho ea matloana le khokelo ea metsi.

A re maemo a ne a se a hloabaetsa kaha pejana ho ile ha e ba le ngoana ea oelang sekoting sa matloana ka lebaka la ho se sireletsehe. A re o ile a kokota le ho Lekala la Thuto ho phalala sekolo sena hobane joale mookameli oa sona a ne a lula a khathaletsa ofising ea hae hore ba hopoloe, 'me ho sa natse mosebetsi o mongata oo lekala le shebaneng le oona le arabetse sello seo.

A re o lebohile mokonteraka ea ntseng a sebetse tikolohong eo ka ho se be leqe ho buseletsa ho sekolong, 'me takatso ke hore le likolong tse ling tse tlokoising ho 'ne ho be joalo.

tlokoising se qetelletse se fumane thuso.

A re ba ne ba tobane le qholotso ea metsi a sieo le matloana a seng hantle, 'me tsena tsohle li ne li ama boithuto ba barutoana ka tikoloho e sa bolokehang eo ba neng ba phela ho eona. A re ba lokela ho thabela mpho ena esita le ho e hlokomela hobane e fihlile nakong eo ba neng ba se na tšepo hore ka le leng la matsatsi ba tla arajoa, kaha ba lekile ka makhetlo ho a lokisa empa ho ne ho se bobebe hobane tsela eo a ahiloeng ka eona e ne e sa ba lumelle ho fa matloana ntlafatso e hantle.

Molapo o supile hore boemo bona bo ne bo sa ame litichere le barutoana feela, empa le sechaba se ne se ameha ka hore litšila tse tsoang matloaneng li ne li fetela metseng.

Sena lekala le se entse tlas'a morero oa phepelo ea metsi mabalane ka mokha-



Moleko o bontšitse hore ba ile ba fumana kopo ea hore nakong ena eo morero oa phepelo ea metsi mabalane o ntseng o sebetsa kahare ho Maputsoe, o mpe o thusetse sekolong seo kaha se le tlhokong ea metsi le matloana.

A re ba ile ba etela sekolo seo ho ea etsa boithuto, 'me ke moo ba ileng ba fumana maemo e le a hloabaetsang a matloana, ao ho seng motsoali kapa tichere e ka phuthulohang hore ngoana a kene sekolo moo bophelo bo sa bolokehang.

O re ba ile ba potlakela ho etsa taelo ho mokonteraka ea ntseng a sebetse sebakeng sena ho thusetsa, "kaha re ntse re ipapisitse le taelo ea tona-kholo ea hore likolo le Litsi tsa Kokelo li hokeloe ka metsi." Moleko

'Muso oa Lesotho ho ntlafatsa bophelo ba sechaba. A re hape e ikemiselitse ho sebetse le ona ka ho kenya letsoho katlehisong ea meoloane ea naha, ho thehela bacha mesebetsi le ho ntlafatsa bophelo ba sechaba.

A bontša bohlokoa ba ho ela hloko polokeho ea tikoloho eo barutoana ba phelang ho eona botelele ba letsatsi, hobane seo se tla hlalisa litholoana tse ntle thutong ea bona.

O itse Naha ea Lesotho e ka holisa moruo oa eona ka metsi, ho theha mesebetsi esita le hona ho tseba ho fepela linaha tse ahelaneng le eona le sechaba kaofela ho se ea sallang morao, ka hoo Basotho ba se silafatse metsi ao kaha e le taemane ea naha ena.

Mokhethoa oa Lebatooa

Mookameli oa Sekolo sa Maputsoe ACL, 'Mahlabathe Molapo o bontšitse thabo ea bona e le e khaphatsehang hore e be kamor'a lilemo tse ngata hakaalo sekolo se le

hlelo oa bobeli, o kentseng letsoho ho hokela metsi sekolong e le ho buseletsa sechabeng nakong eo tšebetso e ntseng e tsoelapele kahare ho setereke.



O sebelisitse Basotho hampe-Sehlabaka

Nthabeleng Seithleko

Moetapele oa Mpulule Political Summit (MPS), Remaketse Edwin Sehlabaka o re Lesotho le se le fihlile moo taba ea naha e hapihoeng e seng e tlisa mathata a maholo sechabeng, lipolotiking le moruong. Litaba tsena o li boletse puisanong le Koranta kamor'a ho ntša polelo ka la 3 Loetse monongoaha.

O re Basotho ba tlameha ho khetha tsela lipakeng tsa tokelo, khotso le nala kapa ho lumella bobolu le bofokoli ho tsoelapele ho ama bophelo ba bona. O re o ile a nyatsa 'muso oa Lets'olo la Ntlatfatsa ea Moruo (RFP) kaha o thehiloe ka metheo e fosahetseng, 'me o ntse o bontša matšoao a ho silafatsa puso ea sechaba ka sechaba.

O qotsa hore ke la pele nalaneng moo tona-kholo e bolellang litho tsa paramente hore li jele chelete ea sechaba, hape e le la pele moo mapolesa a hanelang sechaba ho etsa boipelaetso ka khutso, ha se sa

ts'oaroa hantle ke 'muso. Sehlabaka o boetse a hlalosa hore ke la pele Lesotho le bone tona-kholo a apere seaparo sa sesole, 'me baetapele ba sesole le mapolesa ba kenella ka ea Morena Mohlomi le Moshoeshe I, ho ea ho Leabua Jonathan le Dr. Ntsu Mokhehle.

O itse liketso tse ngata tsa boetapele nakong e fetileng li ile tsa etsoa ka mabaka a



kotloloho litabeng tsa paramente ho thibela taba ea ts'isinyo ea ho hloka ts'epo ho tona-kholo.

O re o ile a hopotsa hore liphoso tse kholo tsa boetapele Lesotho li qalile khale, ho tloha nakong fosahetseng, 'me qetellong li tlositse naha tseleng ea tokoloho le boipuso bo fetseng.

"Ntho e 'ngoe le e 'ngoe e ahiloeng holim'a metheo e fosahetseng e qetella e senyehile." Ho boletse Se-

hlabaka.

A re taba ea naha e hapihoeng e hlokolosi haholo 'me e ka sebelisoa ke linaha tse ling ho matlafatsa lithahasello tsa tsona, eseng ho thusa Basotho.

mpe, le hore eo o ne a se a e-na le folakha ea hae le tsohle tse amanang le litaba tsa tsamaiso ea naha eo.

O re Lipholo o ne a sa lokela ho tsoaroa empa o ne a lokela ho isoa komiting ea khalemo kaha e na le matla 'me e bang litaba li ntse li ts'oaroa tjena, naha e tla ho sitoa ho tsoara likhetho tse akaretsang. O itse Basotho ba ka iphumana ba le lipakeng tsa diabolosi le leoatlle le tebileng, ba tlameha ho khetha lipakeng tsa ho ikopanya le linaha tse kantle kapa ho tšepahalla moahelane Afrika Boroa.

O phethetse ka hore Basotho ba khutlele ho boitelo, setso le meetlo e hloekileng kaha ke tsona tse ka tso-solosang naha. O qotsa boprofeta ba nkho 'Mantsopa le selekane sa Morena Moshoeshe I le Molimo, 'me o re ke ka tumelo le ho hlonama moo naha e ka khutlisoang.

"Basotho ba hloka naha ea bona hore e khutlisetsoe, empa pele ho tsohle ba tlameha ho hlaphoheloa setsong le meetlong tse neng li tsoaea Moshoeshe I le meloko ea hae. Ke ka moo Molimo a tla ka re thusa teng." A rialo.

O re liketso tsa Dr. Ts'epo Lipholo li e ntse hore taba ena e be kotsi, kaha o ile a sebelisa likopo tsa Basotho ho phetha lithahasello tsa hae tsa lipolotiki le tsa linaha tse ling. A re katamelo litabeng tsena e bile eona e

O khantšetsa Majantja

Nthabeleng Seithleko

Lekala la Matla ka Lefapha la Khoke-lo ea Motlakase metseng le nehelane ka motlakase, Seterekeng sa Mohale's Hoek ho malapa a 450 a Ha 'Mapotsane le Ha Tlali ka la 30 Phato monongoaha.

Tona-Kholo Ntsokoane Matekane o hlalositse hore kanetso ea motlakase kahare ho naha ke e 'ngoe ea litšia tse ka sehloohong tsa ntlafatso ea bophelo ba Basotho.

A re ho fihlela joale, motlakase o se o anetse malapa a 54 lekholong 'me boikemisetsa ba 'muso ke ho fihlela lipehelo tsa machaba tsa khothaletso ea hore ka selemo sa 2030 motlakase o be o anetse motho e mong le e mong.

"Sena re tla se fihlela ha re tšehetsa Lekala la Matla ka lichelete tse tsoang mokotleng oa 'muso, hammoho le ka tšehetso ea balekane ba rona litabeng tsa ntšetsopele ea moruo le bophelo ba sechaba, e le ho netefatsa hore morero ona oa phethahala." A rialo. O re morero o sebelisitse chelete e kaalo ka M21 Million e metseng ea Ha 'Mapotsane

le Ha Tlali, 'me lelapa ka leng la hokeloa ka M47,000. A re sena ke sesupo sa boiketlaetso bo matla ba 'muso ho bona hore litšebeliso tsa motlakase li anela bohle.

O supile hore morero ona o hoketse malapa a 450, 'me ho boetse ho na le tšebetso e ntseng e tsoelapele motseng oa Kobo-Tšoeu oa khokelo ea malapa a 350, moo ho sebelisitsoeng chelete e kaalo ka M10 Million, ha lelapa ka leng le hokeloa ka M30, 000.

O ipilelitse ho sechaba hore se baballe thepa ena, ho e polesa hore e be bona ba pele ba fanang ka litlaleho ho sepolesa ha ba elelloa tšenyō.

"Ke ntse ke fumana litlaleho tsa hore libakeng tse ling ho na le batho ba sa ananeleng molemo oa tšebetso ena, ba ntseng ba senya thepa ea motlakase e ntseng e hoke-



khokelo ea motlakase. Ke boela ke etsa boipiletsa ho mekonteraka ho bona hore e etsa mosebetsi ka makhetha, ba boele ba qete ka nako e behiloeng." Ke TK eo a tsoelapele ka boipiletsa.

Ho feta mona, o bontšitse hore o nehelane ka matlo a macha ho malapa a 21 a ileng a lahlehela le ho senyeheloa ke matlo ka lebaka la lipula le meea e matla e ileng ea otlala Naha ea Lesotho. O re 'muso o isitse ntlafatso sechabeng ka ho aha litora metseng e meraro le likolo tse hlano e le ho nolofatsa khokelo ea marang-rang Seterekeng sa Mohale's Hoek.

Ea tsoereng molepo e le Letona la Matla, Mohlomphehi Mohlomi Moleko o supile hore lekala la habo le filoe thomo ea ho khantša Naha ea Lesotho, 'me nehelano

ena ke karolo ea mosebetsi oo ba se ntse ba tsoelapele ka oona. "Re tsoile ka makhalo 'ohle ho anetsa motlakase kahare ho liter-eke tsa Lesotho, re habile ho fihlela taelo ea tona-kholo hore ka selemo sa 2030 Mosotho e mong le e mong a be a khantšetsoa." Ke Moleko eo.


Moleko a bontša hore nehelano ena e arabela sello sa nako e telele sa baahi ba sebaka sena, 'me a ipiletsa ho sechaba ho boloka thepa eo, ho e sebelisa hantle esita le ho qoba bosholu ba lithapo tsa motlakase kaha e tla ama sechaba le ho emisa lintlafatso.

Nehelano ena ea motlakase e etelletsoe pele ke phano ea matlo a 21 ho malapa a ileng a angoa ke sefefe le pula ke Lefapha la Taolo le Thibelo ea Likoluo (DMA).



MoB KIDDS EDUTAINMENT

Puzzle MoB 93-4601



Across

2 Hloele ea a Basotho. Ha li oele tjena he, li bolela hore mollo o chesa ea o orileng (maoa a litaola). (9)

5 Ketso ea ho beha tsohle tlhafung ho isa monoaneng, seatleng, hlohong le molaleng. (5)

7 Ketso ea ho beha tsohle tse tlasa letheka ho fihlela tlhafung. (4)

8 e tona. Mofuta oa taola e nkiloe lenakeng la khomo e tona. (9)

10 boela khetsing u laotse, ha u laotse mofutsana u phethetse. Qetela polelo ena. (7)

11 Phalafala e; ke taola e nkiloe lenakeng la khomo e ts'ehali. (8)

Down

1 Taola e tona, e tsoang tlhakong ea khomo e tona (Mofuta oa litaola). (5)

3 la Thaha e Tala: ha li oele ka leoa lena li bolela hore morena ha a etsisoe (maoa a litaola). (11)


4 Hloele ea: Ha li oele ka leoa lena, li bolela hore lipelaetsano li teng motseng (maoa a litaola). (8)

6 Mantsoe ana a bolela metsi kaofela, qetela leo le entsoeng ka'.....', manyabolo, Lebese la , Mafi a khoho (6)

9 Ketso ea ho beha tsohle tse ka holima letheka, ekaba liphahlo. (5)

THAROLLO

MoB 93-4601





TSA KEREKE

Ba matlafatsoa thomong



Staff

Bakriste ho tsoa matlong a thape-lo metseng ka ho fapakana ba ile ba khobokana ka bongata ho kenyeletsa le litho tsa makhotlana a Mofumahali oa Lefaatše, St. Sabastian Ha Mohasoa le Mofumahali oa Khotso Ha Tseka, moo ba neng ba tsoaretsoe reterete ea letsatsi ke mong'a 'Mishone Fr. Patrick Khali Khoale OMI a tlatsoe ke Fr. Clement Ramotinyane Tampane OMI, Mokatekista Andreas Motlatsi 'Mota le Ntate Michael Molebatsi Ntja. Tsena li bile Parishing ea Regina Mundi, Mazenod ka la 30 Phato monongoha.

Sepheo sa reterete e ne e le ho tla ruta litho tse ncha ho tseba boikarabello ba tsona, joalokaha li sa tsoa khethoa. Hape le ho li laea le ho li fa malebela mabapi le tšebetso ea tsona le neheletsano ea mosebetsi ho tloha metseng eo ba phelang ho eona ho tla tla fihla ho moprista eo e e leng molisa.

Fr. Khoale o ile a qala pele ka ho manollela litho tse ncha ka se ngoetsong hore ba tsebe ho utloisisa pele ba qala tšebetso. A re kereke hore e phethe mosebetsi ea eona, e hloka tlatsano ea batho ba bangata, e leng: babishopo, baprista le badiakone, baitlami le bakatekista, litichere, likopano le bakriste.

Hape e hloka baemeli ba metse, bao e leng baeteli-pele ba sechaba sa Mo-

limo, motseng o mong le o mong; moo e hlohang batho ba tsamaisang thapelo, ba hloelang bakuli, ba rutang bakatekumena, bana ba banyanyane le ba itokisetsang Kamohelo ea Pele le Sakramente ea Tiiso, ba matlafatsang tumelo ea ba fokolang, ba batlang linku tse lahlehileng tsa mohlape oa Molimo, ba khothatsang baetsalibe ho sokoloha le ho khutlela tseleng, ba hlalotsang bacha tsela e nepahetseng ea ho kena lenyalong, ba tšehetsang ba lekhateng la lefu ka lithapelo, ba patang bafu ka lithapelo tsa kereke, 'me ba etsang ntho tsohle tse hlokalahalang ho kenya moea oa sekriste mosebetsing le meetlong ea sechaba.

Hape-hape, e hloka sehlotšoana sa bakriste ba mafolo-folo ba tlatlanang le moprista ho hlophisa lintho tsohle hantle, e le hore mafapha ohle a mosebetsi ea kereke a eelleoe 'me a talingoe ka tsoanelo a kang: Lisakramente le Lisakramentale, mekete le lijubilee, likolo le likopano, paballo ea mafutsana, kamoheliso ea

maqheku le maqhekoana, tlhokomelo ea batšoaruoa le ba sebetsang merafong, lipitso bophelong ba bopristsa le boitlami, lithupelo tsa batsoetse pele ho hlatsuo ea masea le thupelo ea bacha ba itokisetsang lenyalo la bona, thekiso ea Koranta e Katholike, esita le pokello ea linyehelo le ea lichelete tse ling tse hlokalahalang bakeng la tsamaiso e nepahetseng ea mosebetsi ea kereke.

A phethela ka hore haele mona ba tlile boikhutsong bona ba letsatsi e le baemeli ba khethiloeng ho tsoa metseng ka ho fapakana 'moho le makhotlana a bona ke ho bontša hore ba ananetse thomo eo, ka hona o'a ba amohela; ho tla tlotlisa Morena Molimo ka baka la tšebetso e makhathe le ho ba kopela leseli la Molimo le lineho tsa Moea o Halalelang, e le hore ba tle ba tsebe ho phetha litšoanelo tsa bona ka botšepeli.

Reterete ena e ile ea qetella ka Sehlabelo se Halalelang sa 'Missa, moo ho ileng ha hlohonolofatsoa litho tsohle.




2024-2025 SELEMO C

SONTAHA SA 23 HAR'A SELEMO



Bohlale 9:13-19
Pesalema 89
Filemone 9:10.-12-17
Luka 14:25-33



Khothatso

Tse hlokoang ke Bokriste

Mehlang eo re phelang ho eona tumelo ea Sekriste e ka utloahala eka ke khetho; memo feela e ka etsoang ke mang kapa mang e se pitso ea bohlokoa e potlakileng. Le ha ho le joalo, lipalo tsa kajeno li senya boiketlo boo moriting oa tebalo, ka borapeli, boitšoaro le lerato le hlokoang moemeli. Buka ea Bohlale (9:13-18) e re hopotsa hore kutloisiso ea motho e na le moo e fellang, hobane re lokisetsa tsa nama tse imelang kelello haholo. Re memeloa ho batla bohlale ba Morena, boo ka bo-bona bo khantšang tsela ho ea pele. Lengolo la Moapostola Paulosi ho Filemone le bontša hore boikano ba Bokriste bo kopana hantle le bonolo le liketso tse lokileng. Kopo ea hae ho Onesimus e re memela ho fetola mokhoa oa rona oa ho bontša lerato; le sa batlang empa le memang, ho mamela boima ba likamano ka boikokobetso. Kriste Evangeling ea Luka (14:25-33) o beha kapele ho rona phepetso ena: ha re rata ho mo latela re lokela ho "hloea" tsohle tse haufi le rona. Empa e se lehloeo leno, feela re mo rate ho feta lintho tsohle esitana le bophelo ba rona. O re kopa ho jara lifapano tsa rona le ho tlohela tsohle tseo e leng maruo.

Lipalo tsena kaofela li bontša boleng ba bokriste, mehato eo motho a lokelang ho e latela ho ba Mokriste oa sebele e leng: tumelo e tebileng ho Molimo Ntate, ho ba le tekanyo ha re e-ea re lebane le maruo a rona le ho khaohana le lintho tse ka etsang hore re sitoe ho mamela Morena. Ke leeto le thata empa le isang tokolohong ea 'nete, likamanong tse tebileng tsa Kriste le bophelo bo fetohileng ba moea.

Motho ka mong o tseba hantle hore na seo a lumelang ho sona se mo hloka'ng. Matšoele a neng a teetse Kriste hare Evangeling ea kajeno a ne a akha baikakasi, batho ba hlahang mapatlelong a metse le literopo; e ka ba bafumanehi, liritisa kapa lifofu. Ba ne ba hopola hore Kriste o habile teronong; ha eena a ne a tseba hore o tseleng ea sefapano. Ba ne ba hopola hore borutuo ha bo hloke letho, empa eena tseleng ea ho ea Jerusalem moo a neng a il'o hlokoletsoa 'me a shoa, o ne a tseba hantle tse hlokalahalang.

O ile a lokela ho lokisa likelello tsa bona 'me a ba bolella se hlokalahalang ho bohle ba ratang ho mo latela: ho inehela ho eena ho feta tsohle le ha e ka ba lelapa; joale ebe ho itšoa; ho tseba ho laola maruo. Empa ho ea ka batho ba lefatše seo ha se ntho e bonolo kaha ba se na thahasello boikanong, ho lebala tsohle le ho tsamaella thoko le tse ka ba sitisang ho amohela pitso ea bona.

Rona bohle ba shebaneng le memo ea Morena ka grasias ea hae re lokela ho fumana mokhoa oa etsa liqeto mabapi le boiphano ba rona, boitšoaro 'moho le ho tlohela lintho tse ling joaloka maruo. 'Me leetong lena la rona re ipotse lipotso tse kang tsena: lintho tse hlokalahalang ho phela bophelo bo phethahetseng ba Bokriste li'a nkimela? Ho ka ba bobebe ho 'na ho ikela le menate ea lefatše? Ntoeng e teng lipakeng tsa bohlale ba lefatše le ba Morena re khetha bofe?

Karabo ea rona e lokela ebe e pholileng e entsoeng hantle kamor'a boinahano hobane khetho eo re e etsang le susumetsa sebopelo sa rona. Lebaka le etsang hore batho ba bohlale ba khetho ho latela Kriste, ke hobane ba shebile bokamoso le lintho tsohle, ho molemo ho khetha bophelo ho e-na le lefu. Menate le maruo a lefatše a ka re thetsa 'me ra iphumana re ituletse ho ona, re bile re sa lumele hore lintho li ka fetoha. Empa ha re kopile bohlale bo tsoang holimo, bo tla re thusa ho hlalohanya tsa Leholimo le tsa lefatše. Latelang Kriste eo le tsebang hantle ka Eena le hore na o hloka'ng bophelong ba lona ho bitsoa barutuo ba hae ba sebele.

Bahalaleli har'a Beke

8	Loetse	Adrian
9	Loetse	Basura
10	Loetse	Cosmas oa Aphrodisia
11	Loetse	Deiniol
12	Loetse	Eanswida
13	Loetse	Ligorius

O'a ipabola Australia



Tšeliso Thakholi

Semathi se tseba-halang haholo sa Lesotho sa mabelo a mokoka, Tebello Ramakongoana o thabisitse ba bangata ka ho hlaha boemong ba boraro ka nako ea 2:06:47, Lebaleng la TSC Sydney Marathon la botelele ba 42.2Km le bileng Opera House, Australia ka la 31 Phato 2025.

Khalala ena ea Lesotho e bonahetseng e ntlafalitse linako tsa eona, e ileng ea thabisa Basotho ka ho ipabola lebelong lena ka ho phahamisa folakha ea Lesotho lebelong la banna, o ne a eteletsoepele ke semathi se seng se matla sa tikoloho ea Afrika e leng Hailemariam Kiros oa Naha ea Ethiopia eo e bileng eena mohloli ka nako ea 2:06:06.

Maemong a bobeli Ethiopia ea boela ea ipheta

ka semathi se bitsoang Addisu Gobena ea ileng a tsoa khoeleng ka nako ea 2:06:16. Ha boemong ba bone e bile Mustapha Houdadi oa Morocco ka nako ea 2:07:17. Athe bohlanong Naha ea Kenya e ile ea iphumula meokho ka Edward Cheserek ka nako ea 2:07:38.

Lebelong lena le neng le kenetsoe ke limathi tse fetang 25,000 ho hlaha lefatšeng ka bophara, mohloli ka ho banna le basali o ile a ikhapela sabu-sabu ea chelete e kaalo ka \$30,000 AUD. Tebello Ramakongoana o fumane \$10,000.00 AUD. Haele ka ho basali Naha ea Lesotho e ne e sa emeloa, 'me mohloli e bile mpoli ea lipapali tsa li-olympic e leng Sifan Hassan oa Naha ea Netherlands ka nako ea 2:18:22 ea ileng a pokothela chelete a kalo ka \$30,000.00 AUD.

Hassan ea ileng a hapa lebelo lena ka ho etsa na-

lane e ncha o hlile a bontša mokhoa hae, ha ho se ho setse likilomithara tse leshome pele a fihla khoe-leng, 'me a hlahlangoa ke Brigid Kosgei oa Kenya ka nako ea 2:18:56 ea neng a hlile a behile Hassan mer-ebele habohlolo kamor'a ho kena botelele ba likilomithara tse supileng, ho bonahala a se a itsamaela bolacha. Mohloli oa ngoahola oa lebelo lena ka ho basali, Workenesh Edesa oa Ethiopia o ile a khatatsa le ho nyahamisa batšehetsi ba hae ka ho hlaha boemong ba boraro monongoaha ka nako ea 2:18:56.

Joalokaha e ka ha oa lekana Naha ea Ethiopia e ile ea boela ea ingolisa boemong ba bone ka e mong oa baroetsana ba kotsi mabelong a mokoka, e leng Kumeshi Sichala ka nako ea 2:22:50. Linaha tsa Afrika ho kenyeletsoa le Lesotho li bonahetse li ipabola haholo lebelong lena monongoaha papisong le ngoahola moo li sa kang tsa sebetsa hantle.

O tla ka ntho e ncha

Tšeliso Thakholi

Sebini se secha haholo selika-likoeng sa 'mino, Mahlomola Mokoma ea tsejoang 'minong mona ka lebitso la 'Ntate Beat' o re pina ke ntho eo e sa leng a e rata ho tloha kholong ea hae, 'me o tli' o sebetsa ka matla ho itlhlahisa ka mahetla ka

ho tla ka ntho e ncha ea ho hlhlahisa CD ea pele ea mofuta oa eona isao ka khoeli ea Tlhakubele, e tli' o ratao ke batho bohle e tsoakantseng 'mino e fapakaneng kahare ho eona.

Ntate Beat ea seng a e-na le lipina tse 19 tsa 'mino e fapakaneng tseo a ntseng a fana ka tsona mahala ka morero oa ho itsebahat-sa, o re lebaka le leholo la hore a tsoake 'mino e fapa-

kaneng e kang ea Kwaito, Tšepe, Sotho Hip Hop, Lekompo, Famo le Hip Hop ke hobane a batla hore 'mino oa hae o mameloe ke batho bohle, e se ke ea ka o'a khetholla. "Ke batla hore molaetsa o teng 'minong oa ka o nkoe le ho natefela batho bohle." A rialo.

Ka lebaka la ho ba le lerato le cheseho e kholo ea 'mino, o re o se a ntse a kentse linala mobung ho ntša CD e tla beng e tšetse lipina tse 10 tsa 'mino e fapakaneng. "Hona joale ke sa ntse ke li ntša ka bonngoe hore li tsebe ho tsamaea ka pele hore barati ba 'mino ba tle ba tsebe ka mofuta ona oa CD oo ke tlang ho o hatisa isao." O boletse joalo a bile a eketsa ka ho tiisa hore hona joale h'a e-s'o shebane le ho rekisa 'mino oa hae ho hang kaha a sa ntsane a sebeletsa hore setlabocha sena sa 'mino se tsejoe le ho ratao ke batho bohle.

O re o qalile ho sebetsa ka thata ho pheha mofuta ona o mocha oa CD e le hore e be boemong bo phahameng boo e tla ananeloa le ho thabeloa ke batho ba bangata ba ratang 'mino e fapakaneng. A re bohlokoa ba pina har'a tse ling tse ngata ke ho fetisetsa molaetsa sechabeng, ho hlalol-



la, ho bopa sechaba ho se etsa ngata-nngoe, ho tsebana le ho sebetsa 'moho.

A ipiletsa ho bacha le batho ba baholo ba nang le thahasello ea ho bina hore ba se ke ba nyahama ha ba kopana le liqholotso 'minong, empa ba tsebe hore qholotso ka 'ngoe e

tlang ho bona Morena Molimo o ntse a bona hore o tli' o atleha ho e tlosa. Ka hona ba tiie thapelong le mosebetsing oa bona hobane ha ho na qholotso e sa fetehe. "Ba tie 'minong oa bona. 'Na ntho eo ke e batlang ke pina feela!" Ke Ntate Beat eo h'a phethela litaba tsa hae.

<https://whatsapp.com/channel/0029VaksSPUJUM2dmiGDNh20>

Follow Moeletsi oa Basotho

**Official
WhatsApp
Channel**

and stay connected!



Fumana litaba tsa morao-rao, litsebisano, likhatiso le tse ling ka potlako ka menoana feela!



WhatsApp: 6260 0983

www.moeletsiabasotho.co.ls



Liki e Kholo e'a thakhoha

Tšeliso Thakholi

Lipapali tsa Liki e Kholo ea bolo ea moato Lesotho li lebelletsoe ho tla thakhoha ka la 13 Loetse monongoaha kamor'a phomolo e telele ea selemo se fetileng sa lipapali, moo ho bonahetseng boholo ba lihlopha li qalile ka matla a maholo ho itokisetsa Liki ka ho tsoara litholisano tsa boitokiso mabaleng ka ho fapakana ha ona kahar'a naha.

Nako ea phomolo ea lipapali hajoale e felile 'me boholo ba lihlopha li tlii'o kena ka matla selemong se secha sa lipapali sa 2025/2026. Mokhahlelo oa pele oa ngoliso ea lihlopha tse atlehileng ho khotsofatsa lithoko tsohle tsa mokhahlelo oa pele le ngoliso ea libapali tsa Liki e Kholo o se o entsoe, 'me o se o bile o koetsoe kaha o ne o koaloa ka la 31 Phato monongoaha.

Lihlopha tse tsoileng Liking e Kholo ho khutlela ho e ka tlase ea A Division ke sehlopha sa Mzamane ho hlaha Seterekeng sa Mokhotlong e ileng ea nka feela



selemo se le seng sa lipapali sa 2024/2025 eaba e tsoa le moo e keng le teng. Sa bobeli e bile sehlopha se neng se bapala papali e ntle haholo sa Ace Maseru sa motse oa Tšenola, se ileng sa makatsa barati le batšehetsi ba bangata ba bolo ea maoto ha se iphumana se tjebetsoe Liking eo se neng se tsoa ho eona. Sena e bile semaka ho batho ba bangata kaha ba ne ba sa lebella hore se ka qatella se hlot-

soe ke nto. Selemong se fetileng sa lipapali sehlopha sa Lioli 'Tse Nala' ke sona se ileng sa atleha ho hapa liki ebile e le sona se neng se e sireletsa. Ha ho le joalo ke bona bompoli ba tlii'o bula papali ea pele ka la 13 Loetse monongoaha ka ho amohe-la sehlopha se secha sa Liki e Kholo e leng Members ea Machekoaneng tikolohong ea Mazenod.

Ho feta mona hona letsats-

ing le tšoanang Lijabatho e tla isana holimo le tlase le Matlama, Liphakoe e momane habohloko le Machokha. Ha sehlopha se seng se secha Liking e Kholo sa Maroala se tla thulana le sa LDF 'Sohle Sohle.' Letsatsing le hlhlamang ho tla cha khong ho sale molora ha LCS 'Masheshena' e tla be e thulane le LUFC.

Haele Bantu e sa tsoa lahlehelo mafelong a tsoa feta a beke ke Mohope oa

Ramela Football Spectacular o neng o bapalloa Maputsoe e tla ntšana bothaka le LMPS 'Semonye.' Lihlopha ka bobeli li tlii'o qala lipapali tsa tsona tsa selemo se secha tlasa bakoetlisi ba bacha. Lifofane e tla momana le Majantja ha papali ea ho qetela e tla ba lipakeng tsa Linare le Manonyane. Re lakaletsa lihlopha tsohle tsa Liki e Kholo lipapali tse monate tsa selemo se secha.

Li ntšana bothaka

Tšeliso Thakholi

P hala ea Mokhatlo oa Lesotho oa Papali ea Senuka (LECUFE), Monghali Nazar Sortie o

re papali ea senuka ha se feela ho bapalla chelete joalokaha batho ba bang ba lumela joalo empa e bohlokoa haholo kaha e bopa bonngoe, lerato le setsoalle kahare ho libapali. O buile tsena kamor'a

lipapali tsa liki tse bileng ka Butha-Buthe moo sehlopha sa Mathebe se ileng sa teteka sa Green Lights ka phafa e bohloko ea 17-8, 'me ha tlola littlhase ha bahlankana ba betsa phupe ka lefe.



Sortie o re papali ea Senuka e boetse e'a hlabolla le ho fana ka bophelo bo botle ba 'mele le ba kelello. "Ntho e ka holimo-limo ke lerato le bonngoe tse teng kahare ho libapali tse bapalang papali ena." A tiisa 'nete ena ka ho fana ka mohlala ka lipapali tse-na tse tsoa feta tse bileng ka Butha-Buthe hore e bile tse atlehileng haholo. A re ke papali e le 'ngoe feela e bileng lipakeng tsa Mookoli le Shacks e sa kang ea atleha ho tsoela pele, 'me ke hona a tla fumana littlaleho tsa hore na ebe bothata e bile bofe.

Haele tse ling tse ileng tsa bapala ke mona moo sehlopha se tloaetseng ho hlorisa tse ling haholo Seterekeng sa Butha-Buthe, sa Likhanya se ileng sa tsoa ka lesoba la nale ha se ne se sasara sa Korporasi ka thupa e bohloko ea 13-12. Haele City Stars e ile ea tlontlolla Lejoeng ka ho e otlala le sa tšeloeng ke nta ka 17-8. Haele papali e bileng lipakeng tsa Mekaling le Sharks e ile ea chechisoa.

Athe ka mona ka Mohale's Hoek teng, sehlopha se jesetsang tse ling khoebeleng ke Roadside kaha e ne e se lekhetlo la

pele e thuoa Middle East 19-6. White Cafe ea kopana le pela li falla ha e ne e kopane le Snippers e ileng ea e rabella 17-8. Tlali-ea-Tlapana ea phonyoha phafa ka mokhoa oa mohlolo ha e ne e hlola Holy Cross ka 13-12.

Ho sa le joalo, lipapaling tsa Maseru Knockout Tournament tse bileng mafelong ana a beke a tsoa feta, Sortie o boletse hore Sekoele ke bona bompoli ba ikhapetseng chelete e kaalo ka M5,000.00 kamor'a ho halala Airborne ka 13-8, bobeling ea e-ba Airborne e ileng ea ikhapela M4,000.00, borarong ea eba Ciscos le Pasco tse ileng tsa fuoa M2,000.00 sehlopha ka seng. Ka mokhoa o tšoanang a re Lifateng, Mookoli, MCP le Monneng le tsona li ile tsa khaketsoa M1,000.00 sehlopha ka seng kaha li bapetse ka ho lekana.

"Basotho ba ele hloko hore papali ena ha se feela taba ea chelete, empa ke ho tliša setsoalle sa 'nete, lerato le khaphatsehlang, tlhompho, ho holisa le ho matlafatsa papali ea Senuka." Ke Sortie eo a bile a phethela ka lepetjo la eona la: "Don't kill the people but play pool!"